



悲秋

萬里西風入晚扉高齋悵望獨移時  
迢迢別浦帆雙去漠漠平蕪天四垂  
雨意欲晴山鳥樂寒聲初到井梧知  
丈夫感慨關時事不學楚人兒女悲

和鄭叔友厚題真如

南郡趨新幙微官媿野人客懷投寺晚  
歸夢到家頻歲月看蓬鬢塵埃聽葛巾  
相隨一杯酒且慰百年身

和方次雲至日作

至日空相憶何時復此來素書煩蠟炬  
往事付寒杯



夢破風驚竹詩成雨綻梅江城低婺女回首亦勞哉

上汪內相藻生日

天意恢炎曆星躔降昴精典刑存大雅領袖屬名卿  
出入三朝舊青冥萬里程磨鉛周太史視草漢承明  
詞采今宗匠艱危急老成遽旒方側席高燾尚專城  
卜築鄱陽舊懸弧晉水清先君桃李陰比屋袴襦聲  
晝永黃堂夢春晴綠野耕日邊稽召節幙下及稱觥  
盛業期伊呂脩齡頌老彭一麾難久借四海欲休兵  
送鄭察推叔友罷官之潮陽二首

官達身何補才名陸未沉不妨吾道在休較吏文深  
城郭春將暮風雲晚更陰相看炎海闊魂斷欲分襟  
春草故人去落花離緒多芙蓉少顏色蒼苔盡風波  
塵土非長策功名一醉歌周南暫留滯莫改歲寒柯

和蔡司法賞南安之什

一夜晴風吹曉霞平明聯轡踏飛花嵐光且對聖賢  
酒世事僅同蠻觸蝸簿領迷人春易老漁樵滿地晝  
無譁登臨未飽溪山興歸路星星月照沙

春雨中會西山佛迹

自喜平生山水心公餘猶及此登臨雲埋古寺鐘聲  
遠花落空村烟雨深是處芳尊追勝槩幾人寒勒度  
踈林都無春色一分在况有塵寰萬慮侵

陳晉江以壬戌四月上澣宴同僚于二公亭

百年遺址俯郊垆十里蒼波帶古亭隔岸樓臺春去  
遠滿湖烟雨酒微醒苔碑缺落庭松老野鳥去來汀  
草青風物不殊天竺路扁舟髮鬢舊曾經

越十日陪史君汪內翰復來

雅製初仍舊佳名留至今城依刺桐古亭入芰荷深

尊俎賓僚集旌麾刺史臨自公多暇日及此豁塵襟  
再別鄭叔友兼寄方次雲

鞍馬侵三伏萍蓬寄一身及秋歸計早到日附書頻  
炎嶺休長客清漳有故人過逢如問信爲道各埃塵  
三月三十日郊外卽事

雨積稻畦白晴添麥壠黃野橋排鴈齒山路轉羊腸  
鳥語有時好田家隨事忙一年春盡日身迹更他鄉  
夜坐梅樹下率爾

羗吹宣重籥胡床近小臺輕輕雲片度淡淡月華開



壁暗雨留蘚庭虛風落梅納涼公宇邃清夜興悠哉  
和汪端中陪府君遊東湖

漢家虎璽重分銅鑿坡厭直金蓮紅海角瘡痍煩大  
手循良不媿古人風偃蹇霜風鈴閣寂蒙茸春色園  
扉空爲郡風流見前輩隙日車蓋飛城東鰲首虛亭  
未泯滅騷人古意無終窮香風十里菰蒲外喜氣一  
城尊俎中中原景物久荆棘南渡衣冠隨梗蓬此地  
龜文符古識盛觀略與承平同腐儒謬忝無雙裔聲  
價遠慙吾祖童青衫幕府困奔走賴有新詩爲發聾

晚自東湖攜藕花歸兒輩爭插盆池香艷不歇  
亦供兩日嗅翫因成

恠底兒童無遠圖埋盆注水插芙蓉人心不作非真  
想便覺東湖入座隅

壬戌中秋公檄行縣與龔實之同宿于琴泉軒  
搖落江城暮招提訪舊遊泉聲終夜雨竹影一堂秋  
露湛衣裳冷山空枕簟幽故人憐寂寞抱被肯相投  
實之有詩復次其韻

鞅掌從王事招邀媿主人彈琴秋葉落聽雨夜床親

知稼翁集 卷一  
歲月何妨紀詩篇莫厭頻要令千載下不但數姜秦  
早發延福道間偶作錄呈

夜宿姜峰寺曉投劉店村秋光隨杖屨逸興滿郊原  
短句時時得何人細細論鳳凰山下約回首欲飛翻  
陪實之登姜峰絕頂鐫石

抱琴歷高峰拂石就晚陰空山對搖落懷哉千古心  
鄭山鋪用實之韻

一溪清淺抱山根山霧溪烟白晝昏負郭可能無五  
斗肩輿何事走空村

晚泊桃源驛奉懷幕府諸公

鞍馬泊孤亭人烟接古城半村留晚照萬壑送秋聲  
風月思玄度文章媿長卿桃源何處在山驛至今名  
秋旱熱甚尤苦登陟輿中戲成

少皞不用事八月猶苦熱南方本炎蒸况乃甘澤闕  
雨師弛厥職旱魃逞餘孽金石鑠欲流汗池龜甲裂  
稼穡亦已休田家生理絕敢意築場圃漸聞罌瓶竭  
租歛數有恒不爲愆陽輟州縣急錙銖鞭箠動流血  
吁嗟號帝閭此語何由徹空村巫覡舞靈祠香火謁



水旱制於天祈禳恐虛設嘗聞桑林禱爪犧亦清潔  
萬國幾爲魚堯德豈其劣但令備先具難必沴氣滅  
江淮十萬兵仰口資餽輟太倉無宿儲有司憂百結  
腐儒從薄宦籃輿走喘嶮王事有嚴程亭午不得歇  
林鳥呀無聲僕夫屢告暵焉得變玄冬陰厓踏層雪  
宿齊雲寺

行李秋將老停鞭日已西深村見人少孤寺與雲齊  
試問霑微祿何如返故棲雞鳴不成寢乘月下清溪

題鳳凰寺

南安縣

一代表冠霸業休半山金碧梵宮留傷心廢宅松榆  
老滿目寒塘菡萏秋馬鬣未平餘葬地蛾眉不見但  
粧樓憑高欲問豪華事耆舊無人僧白頭

鳳凰夜坐聯句

月黑前村笛風清俯檻琴老苔虛殿閉喬木故宮深  
宿鳥依叢樹踈鐘出斷林夜堂留暑濕秋谷半晴陰  
事業惟歌枕塵埃一散襟勞生倦奔走遠日寄登臨  
割據當年事英雄萬古心青山空白骨華屋漫黃金  
酒薄何勞醉詩成不廢吟艱危多感慨時序苦侵尋

題涼峰

倚杖清秋遠彈琴白晝長  
笙簫離館廢雲木晚峰涼  
往事空流水歸心滿夕陽  
相逢惜分手珍重故人觴

題雲臺寺

西風城郭尚炎威竟日琴尊  
歷翠微紅盡秋林楓正  
落涼生晚寺雨初飛相從  
歲月交情舊此去塵埃會  
面稀往事惟餘故侯塚白  
楊衰草露霑衣

聞太母還輿喜極成歌

嗚呼禍變稔前朝都城千雉  
摧天驕翠華北征沙漠

遙六宮萬里從暈褕我皇龍  
飛守宗祧周宣漢武見  
今朝問安眎膳阻夙宵位極  
萬乘心何聊大哉聖孝  
回天眷戎虜革心非革面天  
邊驛騎急星電傳報  
輿涉淮甸小臣喜極手欲  
抃乾坤一夜歡聲遍遙想  
千官會星弁拜舞稱觴長樂  
殿

題大盈驛壁六言

西風落莫空館暮色迷蒙  
遠巒家近不妨酒盡夜寒  
陡怯衣單

和李元泰宇艷歌



涼風愜人如故舊客燕殘蟬度清晝搖落三秋楚澤  
悲相思一夜東陽瘦愁連黛入眉山重猶憶去年和  
泪送魚沉鴈斷消息稀頻來惟有清宵夢

擬上張丞相魏公

五閏干戈極炎暉歷數新析圭綿六服卜鼎邁千春  
哀痛朝姦稔夤緣國步屯近畿橫彗孛嚴禁失鈞陳  
魏絳謀和狄包胥日哭秦翠華旋北狩清蹕且南巡  
霧塞紛銅馬祥開表玉麟官軍推大弟耆老赴仁人  
唐祚興靈武昭王問水濱悲纏刁斗急警報羽書頻

關輔騰驕子朝廷倚大臣夢符巖肖說天祐岳生申  
濯濯襟靈邁溫溫德業純家聲真不墜廟略信如神  
行潔圭無玷心堅竹有筠蒼生出塗炭黃屋待經綸  
蘇峻稱兵日姬公復辟辰祚危旒在綴主辱涕盈巾  
諸將趨行殿孤軍入帝闈乾坤收逆氣淮海霽妖塵  
尊俎辭樞極旌旄下蜀岷霜稜函谷外春色錦江瀕  
流馬通飛漕推鋒截要津榮親萬鍾祿許國百年身  
盛烈刊彝鼎丹忠薄昊旻流言初抵隙積毀竟排真  
感激回天眷須臾秉國鈞精神千載會霖雨八方均

曉几趨環珮朝班領搢紳荆蠻淹月定胡騎暮年馴  
奉詔移甌越承恩拜紫宸地遙分虎節日暖想龍鱗  
潁上歸黃霸河間借寇恂台衡期必復風俗再還淳  
嘆惜寒門士叨陪上國賓雕虫慙小技連蹇分長貧  
短劔秋仍撫殘燈夜更親曳裾胡不可投壁懼無因  
海運鵬孤翥泥蟠螻未伸濟時公努力宇宙久荆榛

惜別行送林梅卿

大禹赴闕

刺桐城邊桐葉飛刺桐城外行人稀客來別我有所  
適問客此去何當歸林卿妙齡才秀發胸中萬卷涵  
溟渤家聲合沓蓋九州里第嶙峋表雙闕竭來試吏  
天南方驥繫馬能騁所長梅僊脫身東市卒杜老落  
筆中書堂傳道淮壖減豺虎政須禮樂事明主之子  
軒軒霄漢姿好向春風刷毛羽

送汪內相移鎮宣城

龍紀膺圖代龜書出洛年人文初炳煥神化共回旋  
大雅藩籬缺諸儒門戶專天將扶古道嶽始降名賢  
派別軒皇遠江回楚邑偏英靈久蟠鬱簪笏舊蟬聯  
家學傳桑硯詞場着祖鞭風雲千載會宇宙大名懸



行潔圭無玷才長柄有挺西都經術富東閣道山連  
蠹簡煩紬繹羣書益貫穿才超班馬上道探老莊玄  
近代風騷變詞人霧縠鮮俳優驚異體輕薄竟相沿  
作者今亾矣明公獨勉旃狂瀾資反正墜緒得扶顛  
內史趨欄藥中書落筆椽直詞批勅尾清議列龜前  
法駕南巡日妖氛北刺天新亭空涕泪神汴一腥膻  
慰將言彌切徵兵檄屢宣奉天憑陸贄淮上困苻堅  
素祕龍韜策爰叅虎旅權精誠潛貫日勲業合凌烟  
耆舊朝廷倚文章海內傳三長青史筆五典白麻篇

思瞻宮人蠟榮歸御榻蓮研經魚辨魯揮翰驥奔泉  
方後金鑿作聊從銅虎遷瘡痍承帝念愷悌沃民編  
鈴索書齋永棠陰夜月圓豐登諸縣樂治最八州先  
詔易宣城郡恩遺晉水壩歌襦恐來暮臥轍惜言還  
漢守終丞相黃公且潁川長亭春草外巨鎮日華邊  
况復師瞻久由來德望全芝函行召對鼎席卽詳延  
尚父西辭渭司徒北破燕斯民免塗炭吾黨賴陶甄  
竹尺元通籍瓜時忝備員狹提曾識面父執絕隨身  
被遇憐才小懷恩覺體孱塵埃餘冗吏情緒足離筵

歌闋鳧飛渚詩成泪染牋  
轅駒何局促巫步失踟躕  
舊治應騎竹他邦未暖氊  
公歸勞驛騎地遠想台躔  
處士依文舉賢臣頌子淵  
瀛州如許到未敢卜歸田  
九日  
天涯霜露羈離久海內風塵歸思賒  
萬里窮途雙白鬢一尊濁酒對黃花  
頻年奔走哀王粲落日登臨憶  
子孟嘉絕塞歡娛易蕭瑟悲來忍泪望京華

還家

黎明呼羸僮拄策渡野水  
輕嵐翳初日古道步平砥

麥隴黃四出松竹翠相倚  
人間春告盡巖色秀未已  
眼入故鄉明語還親舊喜  
印非朱買臣金無蘇季子  
竊笑免妻孥相過動鄰里  
富貴豈吾謀薄游聊爾耳  
早發東城迂憲車

五更驅倦僕發軔古城邊  
月色潮初上鐘聲入正眠  
自憐筋力在無補歲時遷  
遠媿陶彭澤歸心獨浩然  
暮春宴東園方良翰喜有詩  
入夏追和

要洗襟懷萬斛埃一尊相屬莫遲回  
顛狂柳絮將春去排比荷花刺水開  
懶矣宦情甘冗長拙於句法強



追陪人生行樂須閒健千古朱顏同一顏

自法石早歸

避暑寓祇園黎明度遠村桑麻迷杜曲雞犬散桃源  
逕草細將合溪流深不喧幽懷未能愜城郭已朝暾  
和南安余宰題翠陰亭致爽軒二首

溪光山色兩幽深更結新亭倚翠林老木參天煙漠  
漠虛簷掛日影沉沉三年此地留喬舄六月涼風颯  
楚襟趁取公餘急行樂人生容易二毛侵

面勢揖孤峙交柯藏伯勞日臨公館寂人與此軒高

對酒屢中聖題詩應僕騷喬林思舊隱咫尺聽風號  
癸亥秋行縣夜寓下生院倦甚慨然有歸歟之  
興戲用壁間韻以盟泉石

何須輪擁朱不願佩懸玉青山得去且歸去謀生待  
足何時足林間招提金碧開門外過客誰能來桂華  
落盡無人問古墻秋逕生青苔舊山泉石故應好菟  
裘不營亦可老此身已與三徑期未分淵明迹如掃  
晚泊同安林明府攜酒相過戲集杜陵句爲醉

歌行

疾風吹塵暗河縣去馬來牛不復辨黃昏始扣主人  
門置酒張燈促華饌夜如何其初促膝人生會合難  
再得簿書何急來相仍且將款曲終今夕腐儒衰晚  
謬通籍射策君門期第一天門日射黃金榜自恠一  
日聲輝赫三年奔走空皮骨足繭荒山轉愁疾未有  
涓埃答聖朝途窮反遭俗眼白懷抱何時得好開生  
前相遇且銜杯儒術於我何有哉黃帽青鞋歸去來

賀呂守用中

紫帽山顛秋色高刺桐城頭風怒號乾坤冲融忽異  
態千里和氣生旌旄昂星之精來瑞世要令致主唐  
虞際骨相誕鍾嵩嶽靈風流不泯碯溪裔懷香握蘭  
今幾春瑣闥畫省曾彌綸他年攬轡探禹穴平反所  
活凡千人南土分憂寬主顧棠陰好在來何暮儒風  
郁郁蜀文翁德量汪汪黃叔度相種由來多山東蟬  
聯八葉屬我公百年耆舊謳歌裡萬里山河指顧中  
聲名合沓蓋九州人物中興第一流風雲變化固有  
待蒼虬寧許池中留青衫腐儒趨幙府香火祝公如  
衛武夾輔皇家不計年長將朽質入陶甄



題定光寺 與洵姪期集

爲憐山色好百里赴幽期  
疊嶂生寒早脩林出日遲  
年華空晚晚時事竟艱危  
咫尺故園在題詩有所思  
思歸

醉眼乾坤大歸心日夜長  
風霜歲云暮塵土鬢成蒼  
俗物猶能在危機只自防  
可無田種秫三徑未宜荒

張雲翔搏采蘭堂

丈夫貴成名人子重養志  
志養非鼎食名成要身致  
世上萬男兒二者少稱遂  
樂哉張公子此事有餘地

昔我遊武林始與張君值  
津津紫芝眉落落青雲器  
驂騑步康衢鷗鷺騰秋翅  
一官天南州艱難已嘗試  
悠然望白雲歸來爲隱吏  
軒裳非吾心菽水重親意  
築堂九畹邊遠取南陔義  
膳羞務馨潔晨夕必躬眎  
老人嗜國香幽懷時一寄  
春風敷柔絲色與恩袍類  
不效荆楚俗紉之爲佩  
遂不學會稽亭徒然脩禊事  
願言倚玉樹同作庭階瑞  
他年粉署檜永伴萊衣戲

次韻陳宜中 豐攜詩見訪

朝來乾鵲啁簷牙昨夜燈  
開送喜花好事寧期貴公

子攜詩肯訪野人家客愁到此逢寒食薄宦羈人屢  
歲華載酒他年問奇字故園歸去老桑麻

別方良翰

海上曾聞屬國歸歸來依舊壯心違風塵萬里長爲  
客管庫三年不救饑尊酒欲謀良夜醉庭花故就別  
時飛看君好刷冲天翼莫遣江城過鴈稀

題詩口鋪

一水曳脩帶千山羅峻屏客懷今古泪人世短長亭  
歲月身將老功名夢未醒長卿倦遊久歸思滿巖扃

過白衣莊

草樹天邊碧溪流雨外渾僕夫經燕岫筋力盡龍門  
斜日當幽徑輕風度晚村築場茅屋底約畧似東屯  
題化度寺竹間亭

羸驂踏遍亂山青薄宦羈人醉未醒破午停鞭得幽  
寺眼明初見竹間亭

行安溪道中

鷄豚殆盡官軍過豺虎猶存野老愁萬一皇恩貸兕  
孽會令戈甲變耒耜



矢移彖集 卷一  
道間卽事

花枝已盡鶯將老桑葉漸稀蠶欲眠半濕半晴梅雨  
道乍寒乍暖麥秋天村壚沽酒誰能擇郵壁題詩盡  
偶然方寸怡怡無一事簾裘糲食地行僊

別呂守三首

家世唐蕭瑀風流晉謝安胸中畜丘壑筆下富波瀾  
耆舊謳歌惜賓僚禮數寬龔黃初報政飛詔忽江干  
自此調元去人今臥轍同棠陰閩嶺外星傳浙江東  
四月黃梅雨千山荔子風離亭獨歸處回首意無窮

涉獵媿醇儒南州入幕初力疲三尺法塵滿一床書  
不有劉寬恕何堪阮籍踈才微甘冗長感激辱吹噓

白沙夜聞灘聲

錯認松風萬壑傳又如急雨碎池蓮青燈孤館元無  
寐况復溪聲到枕邊

大水二首

巨浸滔天後遺黎復業初桑田皆變海老稚半爲魚  
鑿石開新道行人問故廬客愁那對此搔首重欷歔  
澤水應垂敝高穹豈不仁發陳遵故事執咎定何人

岸落溪容改山摧土色新傷心問耆舊誰與弔斯民  
題分水嶺兩絕

嗚咽泉流萬仞峰斷腸從此各西東誰知不作多時  
別依舊相逢滄海中

閩粵江南此地分鮑娘詩句尚能存客懷未覺今宵  
好家住壺山煙雨村

題崇安驛

睡美生憎曉色催丹心自媿未能灰塵埃汨汨歲將  
暮霜霧濛濛晝不開身外百端俱長物時危萬事入

羈懷君恩早晚粗酬了糲飯弊裘歸去來

題紫溪驛

離家一月斷家書家在閩山深處居路入江南隔分  
水山猶不見况吾廬

至日戲題天福寺

去年至日老夫家呼兒具酒對梅花今年至日空奔  
走豈止無花亦無酒薄宦驅人無已時客懷牢落強  
裁詩君不見杜陵老詩伯年年至日長爲客

至日題江山驛



客裏萍蓬媿此身天涯風俗對茲辰雲容山意商量  
雪梅蕾葭灰漏洩春歲晚旅懷元自惡夜長歸夢爲  
誰頻遙憐兒女團欒處應念江山飄泊人

上陸鹽生辰五首

拂拂秋風生桂枝于門何日誕英奇請看素魄初圓  
夜正是奎星呈瑞時

高議曾匡馬上翁聲名凜凜尉佗宮誰知千載經行  
地猶有雲來紹祖風

嘉謨合補三公衮餘事聊分八使車想得忠勤徹旒

冕天涯洗眼看徵書

名家詩禮有諸郎飛入南宮鴻鴈行不向人前稱閥  
閱要須僊桂五枝芳

可但人間五福全飄飄真是地行僊摩娑銅狄成追  
憶遊戲塵寰五百年

和泉上人

芒鞋踏遍萬山松得得歸來丈室中破衲一身在懸  
磬清談對客似撞鐘名家要看驚人舉覓句何須效  
我窮春雨地爐分半坐便疑身住古禪叢

進元會詩

昭代干戈戢炎輝曆數長蒼生久蘇息寰海屢豐穰  
社稷基新命朝廷舉舊章太平周禮樂垂拱舜衣裳  
拜壽先長樂傳聲出未央冕旒端黼座儀物備明堂  
閭闔星辰外旂常日月旁天顏春穆穆雲物曉蒼蒼  
雪色殘鳩鵲韶音雜鳳凰嚴宸分羽衛荒服走梯航  
人正今行夏民心舊戴商觀光環萬國班朔首三陽  
列辟鑿聲噦羣工玉珮鏘奉常陳雅奏太史報殊祥  
於穆前朝盛丕承奕世昌版圖還大禹風俗再陶唐

已格無爲治猶懷不敢康幾年脩禘典今日付吾皇  
所願終寅畏無忘每贊襄明良相際會長奉萬年觴  
除夜

暮景流年速寒燈照夜長艱危仍薄宦時序更他鄉  
雪暗吳宮下春歸越嶠傍明朝對佳節無處覓椒觴  
元日次良翰韻

老去低徊強北遊春來消息望南州別離况復年華  
換富貴難令少壯留行李未知何處定屠蘇還解憶  
人不可堪一夜寒江雨滴作羈懷萬斛愁



題方民瞻愷草堂

結宇翳塵外寓形天地間幽懷付松菊高臥對雲山  
門巷來人少琴書竟日閒可憐朝市客名利老朱顏  
和詠陳賢良華表

千年鶴表映溪濱一代鴻文動至尊仕路低徊唐老  
杜才名合沓漢公孫家風不減太丘令盛事何如通  
德門肯把浮榮銜流俗欲遺典則到仍昆

試院中蒙相君惠茶和錢教授韻

誤向文闈齒摺紳相君分賜壑源春窮按千卷非吾

事滿引一杯如故人無復睡魔能偃蹇敢將詩律鬪  
清新西湖好趁清明約泉活涓涓火不陳

將放榜用錢韻

銀袍健筆落雲烟入眼高文墨尚鮮隱隱<sub>赫</sub>聲桑葉  
下看看鵠立棘園前空階夜響催詩雨平地雷轟造  
榜天<sub>是日</sub>試問西湖好風景何如華屋艷神僊

雨後陪省中諸公游竹閣

紅盡桃初實青濃柳欲花春歸人迹少山遠市聲譁  
空有前朝樹<sub>閣前有枯枿相傳謂陳朝樹</sub>難尋處士家<sub>處士謂</sub>登

臨多感慨况復客天涯

將歸

北首寒猶淺南轅暑正深馬蹄長道路鹿性本山林  
客至能相勉愁來可獨禁功名竟何物造化久冥心

離臨安

細雨出江城潮回江正清未能捐俗累不敢憚嚴程  
落日行人少空山獨鳥鳴離愁似春草觸處便能生

題須江驛詩後

歸來已負百花期閒拂塵埃看舊詩極目平蕪二千

里鄉心惟有杜鵑知

題白沙鋪

負郭可無三頃秫蓋頭幸有兩間茅還鄉且盡田家  
樂舉世誰非市道交村酒一杯澆磊塊山程數驛更  
磽嶮羸驂莫恠歸鞭急心在輕紅荔子梢

和超然翁韻二首

才微祇合老荆扉悞竊虛名及盛時藜杖端須爲劉  
燭匏竽聊復預齊吹亨衢騰蹕非吾事客路逢迎仰  
已知莫訝歸程秋向晚也應去魯自遲遲



西風回首故鄉情何日爲園學邵平已辦孤帆衝夕  
浪可堪萬壑更秋聲折腰爲米追時輩當面輸心媿  
老成飲罷歸來未能寢微吟擁鼻數寒更

不見

碧湘幽夢秋帷冷玉滴宵壺聲耿耿平生不作等閒  
愁風月故人長引領青樓花開歡正新當時握手欲  
留春樓空花落春竟去惟有紗窓鎖暗塵風流回首  
年華晚愁與宮眉添宛轉不堪翠袖裛殘香六曲屏  
山爲誰展

御賜閣額二首

傑閣侵霄漢宸章煥壁奎內庭頒寶宴中使揭璇題  
信誓山河固厖恩雨露低寒儒倚天祿目斷五雲西  
功掩蕭何第名超崔氏堂孤忠扶社稷一德契穹蒼  
金碧飛翬外鸞虬結綺傍落成紛賀燕弱羽得高翔

西湖會同年和巫子先

韻制時子先以臺  
不赴坐

一鷗獨立鳥羣空寂寞誰憐漢閣雄鴈塔他年曾接  
武烏臺今日自生風平湖入座搖寒碧返照催人墮  
晚紅目斷禁城驄馬客何時譚笑一尊同

黃憲生朝三首

國勢巍巍盛時髦衮衮生雲師綿世胄漢相舊家聲  
學海波瀾闊神峰冰雪清天涯逢誕日目極曲江城  
經術賢關望訐謨帝席前詞場聲擲地憲府力回天  
金鑑風流在炎陬雨露偏慇懃理歸楫早覲日華邊  
陰德千人活霜威五嶺寒三持使者節一着惠文冠  
臺省班聯忝賓僚禮數寬微官慚束縛稱壽阻門闌  
送陳應求赴官  
莫辭酒且聽歌休被驪駒白玉珂主人勸客終今夕

明日長亭可奈何金風蕭蕭塵餘熱砌蟲唧唧助淒  
切此時景物不勝愁况是離人心欲折陳侯陳侯貌  
巖巖而俊整才浩浩而清絕有如壺山之萬仞嶺岼  
壽水之千尋瑩澈青芝赤箭藥籠儲金鐘大鏞廊廟  
須天生奇才爲時出容易棄擲天南隅君不見馬賓  
王新豐一逆旅又不見公孫弘菑川一老儒逢辰立  
譚取卿相至今文采照天衢廣文官舍雖落莫刀筆  
不與俗吏俱公餘更勤五車讀未必不是北門西掖  
之權輿刺桐古城花欲燃舊遊人物想依然憑君到



彼訪二陸向道故人飽飯度殘年

送弟童士季赴永春

贈君以宣城秋兔之穎佩君以嶧陽焦尾之琴餞君以顯父清壺之酒送君以安仁金谷之吟筆傳洙泗之正印琴彈單父之遺音酒以陶百里醇醲之化詩以寫一時離別之心門前車馬氣駸駸黃葉飛翻秋正深風雨對床連夜語江山異地欲分襟憶昔聯名唱行殿一日聲華九垓遍自知無用甘林泉君亦何爲尚州縣君今未用歎滯留丈夫勲業要晚收信臣

千載循吏傳密令當年褒德侯高才所莅無全牛民自不寃吏早休倘免誅求急星火行看寇盜盡鋤耰

無題

雞虫底處覓得失鳧鶴無心較短長醫國未能三折臂憂時空費九回腸

送外兄方卿公美廷實赴廣東憲十絕

九重仁聖不忘遠庶獄哀矜軫慮深本恕定知黃霸用無刑端契有虞心

遐陬赤子困侵牟跳弄潢池今幾秋從此聲威懾強

梗自然戈戟變鋤耒

石門酌水賦新詩舊事曾聞吳隱之習習清風化貪  
懦不圖今見古齊夷

親輿昔侍角方總使節今持鬢未蒼竹馬兒童半相  
識分明遺愛在甘棠

早晚芝函下九天不容瓜戍更期年蒼生屬望為霖  
久肯使炎方雨露偏

聞道韶陽一畝宮居民奉祀曲江公憑君到日酌尊  
酒醞藉風流事事同

恠底青雲嬾着鞭年來餘事覺真詮園扉書闥庭無  
訟時訪曹溪六祖禪

千里江山一鴈聲廣文官舍冷如冰祁奚若未忘公  
舉魏戊猶堪備內稱

新息功名晚始收送君今去踔鳶州男兒未上雲臺  
盡莫念平生馬少游

十里紅旗擁使星一杯綠蟻話長亭明朝車馬各南  
北誰唱陽關且細聽

和宋永兄罷官還家途中見寄四絕



三年惠政留巖邑千里歸舟犯惡灘  
烏鵲信傳知漸近白鷗盟在未應寒

流年忽忽雙蓬鬢薄宦紛紛一旅亭  
惟有長官衫色在至今猶與眼俱青

知稼堂中一味閒卷簾終日臥看山  
雖無微祿供貧病幸有新詩伴往還

不比人心驚歲移且看鴈影逐春歸  
明朝已辦椒花頌相對一尊总是非

送余子美歸淮上

恠底窮途遭白眼依然別酒對青春  
百年甘旨爲貧計千里羈棲有故人  
道在不妨輕去魯功成他日會歸秦  
江淮若遇南飛翼尺素無忘東海濱

西郊步武地春將老矣不能一往朝  
吉妣今日爲遨頭澁雨大作非惟人心  
難并止或尼之枕上得小詩資宋永兄  
一喙因呈昔遊兄弟速尋舊盟勿爲天  
公所玩

無復西郊訪綺羅任教佳景去如梭  
殘杯冷炙何曾夢亂絮飛花積漸多  
舉世盡從忙裏過幾人能共醉

時歌不辭作意營春事急雨狂風可奈何

巳巳九日陪陸史君宴共樂臺和莊倅韻

一年秋色垂垂老九日寒花處處同  
落帽何人羞短髮危臺向晚易高風  
黃雲萬頃峰巒下白雪幾聲霄漢中  
陌上行人盡回首史君開宴在層空

和宋去華藻愛日樓之什

百里平疇一望間綠蕪盡處見青山  
孤雲自在開仍合白鳥羣飛去復還  
竟日茶瓜留客坐滿床圖史伴君閒  
攜醪許我問奇字剝啄何妨屢扣關

和宋永兄愛日樓見寄八首

畫圖展處千山雪漁艇歸時一笛風  
爲愛東溟日色好側身樓外望壺公

陳樓高臥真佳士陶徑歸來有古風  
只恐功名不相放驅人須作黑頭公

野意樓前滿秋聲樹杪回歲華行老矣  
午夢思悠哉碌碌甘捐棄時時幸往來  
不才詩有債多病酒爲媒醫手無三折  
愁腸漫九回宦情聊復爾世事轉艱哉  
狂態未能免新詩特地來從今罷歌舞  
焦尾聽無媒



軒組挽人力萬中無一回急流能退者捨我有誰哉  
此意何時遂相攜歸去來東臯春雨足荷鍾聽鳩媒  
韶齷攜書冊成名天上回如公希世者自古幾人哉  
山藪詎宜去功名看鼎來人間無伯樂相馬失龍媒  
秋心驚杵急遠目見潮回衰日可愛也楚風真快哉  
卷開前聖對竹動故人來去魯遲休惟謀身恥自媒  
山林往不返朝市去無回能樂窮通者真知出處哉  
次山稱漫仕彭澤賦歸來堪笑脅肩子相從不待媒  
和史君邵農之什

五馬邵農遠過宗文武車興詠遍屬郡僚顧  
小子狂斐之章當詩人麗則之賦鵠未成而  
類鶩狗不足以續貂燕類可羞斤削是望

交情自許膠投漆賓主相輝璧與琨賣劍早書循吏  
傳種瓜時問故侯園百年耆舊須親訪千里耕桑戴  
上恩一郡風流古來少筆端珠玉富歸軒

三瑞堂陸守

機雲二子才孤標妙齡馳聲典午朝今見遠孫來海  
嶠儒雅雍容飾漢條德化醇醲春有脚天姿粹美玉

不彫無復犢牛充帶佩坐令襦袴成歌謠蘊藉斯人  
合臺閣暫把一麾亦不惡鈴閣正午槐陰清訟庭無  
人鳥聲樂政成瑞應一何多天香國艷駢花萼可但  
漁陽頌麥岐會見西京紀神爵吾聞作善天降祥拭  
目泥封下建章一時文采七閩郡千載風流三瑞堂  
坤珍效祉來未央九莖怒芽抽且長胡不圖之獻天  
子播在樂府歌芝房

庚午秋觀進士入試

棘扉曉闢萬袍趨鄒魯雖微士所都三獻有人懷楚

璞濫吹何事試齊竽要令瘦語題壺白莫把玄文覆

醬瓿

鄉人以黜  
卷幕酒

袖手傍觀君勿恠箇中曾是老於菟

次韻宋永兄白髮

銀鬢詎如許金丹奈若何休垂髀肉涕莫擊唾壺歌  
世事奕棋局人材在沚莪未須相料理大器晚成多

回文絕句

歌闕一尊清晝長曲池小景晚風涼波微動處見魚  
戲荷半開時過雨香

贈炊僮



雞唱度纔三羸僮井臼採缺瓶分曉月古竈湧晴嵐  
口腹真吾累庖厨賴爾堪支離不耕者對案敢無慙  
和蘇伯承題恂恂軒

可但溫恭九族敦平生鄉黨更恂恂山林得趣身長  
健門館無私物自春一室琴尊對咸籍百年膠漆付  
雷陳共傳宅相工題品未數東坡德有鄰

春日書懷

才薄難任家國憂年衰未免稻粱謀權門雖好羞搖  
尾世路多猜敢轉喉是處溪山可藏拙何人庭院許

尋幽便須火急營春事九十韶光一半休

次韻宋永兄春日放言寄秉彝端廣文兄

君不見邊孝先才得午枕一覺眠便遭弟子嘲便便  
又不見馬季長橫經高堂坐絳帳背後女樂盈妖妍  
青春一去少者老白髮不分愚與賢試看刻苦要稱  
天下士何如落魄且作地行僊東風來習習新月照  
娟娟若逢花解語須用酒爲年

唱和盈軸而燕集未期小詩請廣文兄爲遨頭  
煩君管領東君手收拾風光尊俎中與作遨頭共春

燕何須擁鼻學秋虫誰憐老子興不淺自笑窮人詩  
轉工趨取身間酒價賤明年此日又西東

宋永兄見和春懷再賦仍約秉彝兄尋春西郊  
朱轂常懷蹉跌憂華門長苦斗升謀此生幸不貧到  
骨未死何妨酒入喉北里人隨春漸老西郊地與興  
俱幽憑君更語廣文叟飯足還須醉始休

宋永兄一訪青帝而黃婆作惡累日戲作小詩

問安二首

鳴鐘伐鼓南山阿傾城車馬相憂摩萬鈺高下照朱

碧百堵往來紛綺羅身入醉鄉頰紅玉月明歸路湛  
金波挽君一出臥三日奈此陌上春光何

陌上春光遽如許花落花開任風雨誰憐四印居士  
賢苦遭造化小兒侮古來醫手罕折肱老去流年劇  
飛羽無復當時倒載歸羣童拍手山公舞

次韻宋永兄感舊五首

猶憶當年歌盡空乘歡直欲舉千鍾韶光半老不相  
識樂事一生能幾逢戲蝶狂蜂隨意好閑花蔓草向  
人濃當壚春色今何在病酒相如臥蜀邛



何用咄咄愁書空何用鼎食鳴金鍾流行坎止隨所  
值穠蒸不憂年不逢金釵困嬾海棠睡玉笋淋漓琥  
珀濃安能辛勤鍊石髓苦學成周人姓邛

齧齒談經動聖聽山川英氣向來鍾中書落筆萬人  
繞天陛賜袍千載逢利鏢名韁身半老酒徒詩社意  
偏濃莫欺犬子倦游久得志猶能通笮邛

待價君方藏尺璧知音誰解聽號鐘渥洼天上非無  
種伯樂人間那易逢墨綬解來三歲改白雲飛處寸  
心濃鷓鴣翔鸞伏古如此直道不容非孔邛

三分春色二分空莫待春歸怨曉鐘詩句逼人何太  
甚酒徒知己信難逢百年夜永晝愁短千樹紅踈綠  
漸濃尊俎班荆元不惡試張雲幕席茗邛

雨後春遊

鳴鳩乳燕報新晴更被提壺苦勸人萬點桃花落紅  
雨十分蕉葉負青春醉鄉歸去疑無路詩筆拈來似  
有神莫惜千金買一笑餘年樂事更關身

雨後行花園

習習春風軟遲遲春日暄生意遍宇宙盡托青皇恩

屏翳剛作惡一夜如翻盆奔流萬壑怒比曉千山昏  
鳴鳩喚我起杖屨行中園呼僮理僵仆春事無半存  
蓬蒿增意氣蘭藥遭排根雖無桃李妍却有桑麻繁  
萬化相除謝此理誰明論去去勿復辨榮枯任乾坤

偶成

野鳥春布穀階虫秋絡絲啾啾空過耳終不救寒饑

贈泉守趙表之令衿二首

禪翁笑擁兩朱輪塵尾蒲團付底人千里謳吟真刺  
史三朝出入老宗臣春風半道旌旗轉南國一番桃

李新莫把蹄涔留尺鯉早令圖畫上麒麟  
扁舟昔艤浙江邊曾醉王孫玳瑁筵竹杖芒屨晚城  
上金荷銀燭夜堂前宦游我輩聊復爾聚散人間亦  
偶然誰料天涯今八載青燈相對各華顛

春日宴共樂臺

畫棟朱甍插紫清連山帶水自行縈閭閻高下魚鱗  
比田畝縱橫碁局平花發鳥啼春耐事夜闌客散月  
多情寸陰自古千金重一笑人間萬慮輕

秋夜獨酌



溪山態足身無事天地功深歲有秋投老相從管城  
子平生得意醉鄉侯捲簾清坐月排闥橫笛誰家風  
滿樓可是離人更遺物自緣身世兩無求

午睡起得富沙信

閒處工夫要破除茅堂一枕黑甜餘漆園栩栩看成  
蝶邊笥便便舊貯書掃盡機心還罔象了無行迹便  
華胥故人千里能知我遠寄月團供燕居

題順濟廟

枯木肇靈滄海東參差宮殿萃晴空平生不厭混巫

媪已死猶能效國功萬戶牲醪無水旱四時歌舞走  
兒童傳聞利澤至今在千里危檣一信風

冬日道間

歲熟牛羊飽村寒鳥獸呼霜餘山骨露水落澗毛枯  
歸艇收漁網行人問酒壚微軀任南北未覺旅懷孤  
贈延福端老二絕

飄然瓶錫信行藏偶駐姜峰古道場欲識高人用心  
處白雲堂下一爐香

我來欲問小乘禪慙媿塵埃未了緣忽憶去年秋夜

話共聽風雨不成眠





